

Tscheiver e cureisma avon dertgira nauscha

In vegl usit da tscheiver ei sil precint da svanir

DA MARTIN CABALZAR

■ **Actualmein domineschan tils da tscheiver, premiaziuns da mascras e tuns da «guggas» il divertiment tscheivril en Surselva. Sulet a Mustér dat ei aunc la Dertgira nauscha che regorda al vegl usit ch'ei curdaus en emblidanza.** Ils Romontschs han apparentamein gia da vegl enneu giu in grond interess ed ina certa inclinaziun per damondas da dretg. Tier la veglia «Dertgira nauscha» setracta ei d'in process criminal sur dil giuncher Tscheiver, in stradaus dalla veglia Cureisma. La Crestomazia retoromontscha edida da Caspar Decurtins reproducescha differentas versiuns ch'ei vegnidadas 1764 a Rueun, 1772 a Sumvitg e 1795 a Breil.

Cults precristians

Igl origin da tals giugs ei da catter el cumbat denter las stagiuns ed en usits ed isonzas che presentan il cumbat denter unviern e primavera, denter glisch e stgiradetgna. Singulas isonzas ein semantenedas entochen el temps hodiern, sche nus partertgein agl usit da trer schibettas, a chalandamarz, agl um strom ed agl um selvadi. Tec a tec ei igl unviern vegnius remplazzaus dil giuncher Tscheiver che persunifichescha il divertiment, las fiastas e las mascras. Ed en quei grau ston ins esser staus pli baul nuota maufers. Aschia ha la Ligia Grischa stuiu decretar 1497 in rigurus scamond «dad ir a bagordas».

La Dertgira nauscha ei in giug che tracta la cuntraversa denter tscheiver e cureisma. Fertion ch'il giuven Tscheiver gauda la veta cun saults e sulazs, ei la veglia Cureisma ina adversaria da tut divertiment. Quella dispeta meina la finala ad in process criminal che ha liug tenor veglia isonza sut tschiel aviert.

Dertgira nauscha da 1764 a Rueun

Il pli vegl text enconuscent ei quel dalla dertgira nauscha da Rueun digl onn 1764. La Cureisma cumpara avon dertgira sut tschiel aviert, veglia, magra e malscultrida ed en cumpignia dad in advocat e dad in derschader. Quel porta plogn encunter il Tscheiver. Quel hagi menau las davosas jamnas ina veta scandalusa, promoviu schliatas inclinaziuns ed ordinau divertiments per aschia trer «ella reit da ses schliats apitits il zunt innocent pievel giuven». Vegnend quei ad ureglia alla Cureisma hagi ella ladinamein admoniu il «gottlos scheiver», mo quel hagi smanatschau da prender la veta alla Cureisma. Sinquei hagi ella laschau arrestar el ed ella porti ussa plogn, spetgond che la dertgira bandischeschi uss il Tscheiver «ton gitg a lunsch» ch'ins seregordi buca pli dad el.

Per il Tscheiver rispunda il «sechelmeister» al plogn. El fa valer ch'ei seigi bein il dretg legitim dil Tscheiver «da ira en compagnias, da bien beiver a migliar e sunar, a saltar a star se legher cun da quels da siu pèr». La smanatscha encunter la Cureisma seigi buca stada manegiada diltut serius, quei documenteschi il fatg ch'ella vivi gie aunc. Alla fin da siu pledoyer supplichescha el «la ludeivla Oberkeit» da proteger ils dretgs e la libertad dil Tscheiver.

Ella replica vul la Cureisma presentar perdetgas e scartiras che attestan ch'il Tscheiver hagi menau ina veta scandalusa. En la duplica fa il Tscheiver valer che in e scadin hagi ses dis e ses dretgs ed el pretenda dalla dertgira ina prolungaziun dils dis d'arrestaziun sin donn e cuost dalla Cureisma ed ina satisfacziun en danners per saver cuntinuar culla fiasta.

Las perdetgas dalla Cureisma attestan

al Tscheiver ch'el seigi buca mo staus culs mats, anzi hagi era mess narradads els tgaus dallas mattauns. La dertgira dat la finala raschun alla Cureisma ed il giuncher Tscheiver vegn bandischaus ord la tiara. Sia facultad croda al «sechelmeister» che ha giu teniu in plaid da defensiun sco ugau dil Tscheiver. Considerond sias empermischuns, sia giuvenetetgna e ses nobels talents retscheiva il Tscheiver la fin finala in perdun da 100 onns e po puspei turnar suenter 43 jamnas.

Dertgiras nauschas a Sumvitg e Breil

Dertgiras nauschas sco nus vein descret sura vegnevan representadas en pliras vischnauncas viers la fin dil tscheiver. Enconuschenta ei la Dertgira nauscha da Sumvitg da 1772 ch'ei scretta en rema cun vers da 4 silbas accentuadas (Crestomazia tom 1. pg. 439–452).

A Breil duei il giuvenot da 17 onns Pieder Anton de Latour haver scret 1795 ina dertgira nauscha e fatg sez il giuncher. Auters manegian ch'il plevon dil liug canoni Giachen Baletta (1748–1814 vegni plitost en damonda sco autur. La versiun da Breil remplazza ils nums dils «geraus» cun nums da tempr tscheivrila sco: «Stoffel ha fom e seit, Andriu cupida fetg, Gieri svida glas, Martin fa da fin, Tschontschalom, Padrut fila sachel, Salomon tschetschamèl ed auters.

La sentenza finala ei la suandonta: «Il Tscheiver duei s'absentar en 10 dis e la Cureisma star en bien ruaus entochen ch'ei tucca da mardis tscheiver il zenn grond. Il tscheiver e ses serviturs duein lu schon esser entochen Glion».

La sentenza finala ei la suandonta: «Il Tscheiver duei s'absentar en 10 dis e la Cureisma star en bien ruaus entochen ch'ei tucca da mardis tscheiver il zenn grond. Il tscheiver e ses serviturs duein lu schon esser entochen Glion».

La Dertgira nauscha da Breil ei vegnida representada aunc igl onn 1867 a Rueun, lezza gada en ina versiun empau modernisada ed edida da Giacun Hasper Muoth e la Cumpignia da mats da Breil duai haver representau 1885 ina dertgira nauscha tenor l'ediziun da Caspar Decurtins. Pli tard (1948) ha Donat Cadruvi adattau quella versiun, tschercond d'actualisar e concentrar las parts dalla Dertgira che erien «bravamein ladas e braccas». Per l' exposiziun naziunala da 1964 ha il scribent *Gion Deplazes* modulau la veglia Dertgira nauscha sco giug auditiv cun cant da Benedetg Dolf.

Dertgira nauscha a Mustér

Sco quei ch'ins legia silla homepage dalla Dertgira nauscha da Mustér ha quella sias ragischs el temps baroc. Entochen la fin dil 18avel tschentaner vegnevi fatg dertgira nauscha da gliendisdis tscheiver silla piazza avon la casa cumin. Quei cun la participaziun dalla cumpignia da mats e dall'entira populaziun. Sil pli tard igl onn dils Franzos, igl onn 1799 cu Mustér e la claustra ein daventai unfrendas dallas flommas, seigi ei iu a fin cun quella tradiziun. Igl onn 1989 han entgins commembers dalla Uniun da tscheiver Mustér puspei repriu quei usit curdaus en emblidanza. L'auter onn vul ins festivar il giubileum da 20 onns dalla dertgira nauscha regiuvinata.

LA SENTENZA

Quei ch'era inaga mellen e fidau, ei ussa
 grisch e passau. Lein buca tolerar vinavon da
 quels cuglienems cun A e B!


Gie, posta, bia reglas has ti mess si, tuntas
 per tiu avantatg e pil disavantatg dalla clier-
 tella.
 Denton cun in'exceptiun: cul scamond da li-
 gear corda entuorn ils pacs vein nus spargnau
 bia meters corda.

Ed ussa ha ei num:

**Vid la corda che nus vein teniu si,
 lein uss la posta pender si!**

...auscha decidiu:



LA POSTA 

PRESS!

Sulet a Mustér han
 ins puspei reprim
 igl usit dalla Der-
 tgira nauscha. MAD